

老里八早

当年卖瓜是大事体

文 / 郑自华

天气老老热了，水果店里，马路边浪个地摊，侪是西瓜，牌子浪写个都是上海名牌西瓜“8424”。夜里乘风凉个辰光，居民笃笃定定拣西瓜，随买随吃，交关方便。老早吃西瓜个尴尬脚已消失得旡没踪影了。

上个世纪 80 年代初期，还是计划经济。对居民来讲，天热要吃一眼西瓜邪气勿容易，其实，搿个辰光卖西瓜更加勿容易。埃个辰光，我辣拉一家食品店当小头头，管百把人。辣拉西瓜上市一个号头【月】前，上级公司就开始布置，要打好西瓜战役。讲西瓜战役，搿搭旡没任何夸大个意思。辣每年西瓜供应季节，果品商店、食品商店就紧急动员起来了。员工个休息全部取消，一半员工负责日常营业，一半员工负责西瓜供应。商店个格局早就做了调整，柜台进行了合并，腾出一半店堂间摆西瓜。西瓜供应是一项政治任务，要保证居民吃到、吃好西瓜。因此，团支部早就做了动员，青年突击小组也成立了起来。一些小青年特别能战斗，吃辣店里，睡辣店里，几个礼拜勿回去。有眼家长勿放心，就偷偷摸摸跑到店外头，看看自家个小囚。

伊个辰光个西瓜凭小菜卡供应，5 个人算大户，5 个人以下算小户。大户供应 30 斤，小户 20 斤，小菜卡由营业员当场剪角。送西瓜个车子还旡没到，店门口就有人排起长长个队伍，住辣商店附近个居民老早就摸透商店进货规律。勿过，发烧 38 度以上、凭病历卡可以勿要排队，优先照顾购买一只西瓜。稀奇个是，伊个辰光，从来旡没发生过病历卡造

假、冒充个现象。搿个辰光西瓜好坏勿稳定，质量勿大灵光个，卖起来就老吃力。农民伯伯辛辛苦苦种出来，又勿好随随便便浪费，总要想办法，乃末，熟手【业务尖子】就派用场了。熟手就是有水平，拣了一只西瓜，用尖刀挑出一只三角，红颜色个瓜瓢让消费者看得老开心，再让消费者尝一口三角瓜瓢，板定是老甜个，熟手顺便再拣几只，凑满可以规定购买个分量，或者超过规定分量，让消费者多买一只西瓜，并再三关照迭只先吃，迭只后吃。居民碰着迭种营业员，蛮捣抖【开心】。熟手还辣拉西瓜浪做记号，劈如辣拉某个部位削脱一块皮，以防将是本店个瓜拿来调。由于西瓜质量勿稳定，吵相骂是经常发生个。卖瓜最麻烦个是熟与不熟，有眼西瓜瓜瓢是红个，但是不甜；有眼有甜度，瓜瓢、瓜子是白个。西瓜个甜度又旡没办法可以测量，西瓜又勿是机器加工个。为西瓜是勿是熟、几分熟而争论勿休，天天要面对几百个顾客讲同样个闲话，营业员真勿好做，营业员勿可以顶撞顾客。店堂间热得像火炉，几只电风扇又旡没办法将大家个火气压下去，为了勿影响做生意，我就出面当老娘舅，将顾客请到边浪，端一杯冷开水，用冷毛巾揩一把面孔，再好好叫讲道理，最后退眼钞票，或是再送一只小西瓜，算是解决问题。

整个西瓜战役两个多号头。西瓜战役结束以后，每个人辣拉写小结个辰光，侪会出现迭能介个闲话：“虽然嗓子哑了，皮晒黑了，人变瘦了，可是，我们的心更红了。”现在看来，迭种说法有点夸张，但是蛮有道理！

西瓜皮捉蚊子

文 / 颜志忠

逢着瓜市，一面吃西瓜一面看电视是阿拉屋里每日天夜里个必修课。一只西瓜对剖开，囡儿搭我一人一半，互勿侵犯，家主婆个调羹辣我搭仔囡几个“地盘”里“打游击”，收作瓜皮瓜籽啥啥倒是我包脱个。一个周末，电视看到夜深，剖成半圆形个西瓜老早刮得来生青。拿瓜皮搬到垃圾箱，要暗里墨脱穿过一条揩布。我懒了，想明朝再搵，就随手拿西瓜皮摆辣灶间个墙角落。

第二天一早起来，我看到刮得生青个西瓜皮浪向哪能有几个小黑点，佷下腰低头一看，噢哟，适适意意停仔六七只蚊子，一动也勿动。头子活络个，寻着避暑胜地了，阴笃笃，甜滋滋。我用手节头对准顶上头个一只揪过去。“噙”一记，飞脱两只。“爸爸，罩牢伊。”读二年级个囡儿递过来一块揩布。我接过揩布就朝西瓜

皮浪向罩上去。大热天，揩布经过一夜天蒸发，干得轻飘飘。辣揩布还旡没来得及拿西瓜皮罩着实，又有两只蚊子从缝缝里滑脚。动作慢个几只，罩是罩辣里向头，我倒一时上头还想勿出有效个处决手段。正辣犯难，家主婆出了个主意：“用水淹。”我拿瓜皮捧到水龙头下，打开龙头，让水从揩布里淌进去。等水放满，慢慢叫掀开揩布，三只蚊子已经余辣水面浪。还有眼勿放心，拿手节头捏一记，绝对旡没生路战。第二天，再用搿种办法诱捕，灵光个，又有六七只蚊子中计入“瓮”。我拿揩布弄弄湿再罩西瓜皮。因为湿布有点分量，一记头闷牢瓜皮，移到水龙头个辰光又勿发飘，搿记战绩辉煌，一网打尽。

后来，电视台摄制“家庭巧法灭虫害”节目，阿拉一家门作为发明者搭仔示范者，辣荧屏浪向介绍了拿半只西瓜皮捕杀蚊子个操作过程和灭蚊效果。



远开一眼

人人会老

文 / 彭瑞高

上世纪九十年代，“七零后”二十郎当岁，有些小人自以为是，看不起老辈。老辈就讲：“你们也会老的。”他们不相信。他们不晓得“老”的概念，“八零后”起来了，有些小人也轻狂。大岁数的人劝：“你们也会老的。”他们也不相信。他们也没有“老”的概念。

曾几何时，“七零后”还没怎么感叹，黄金时代就过去了；“八零后”三十出头，居然已在“叹老”了。回头再看这些小人，实在又气又好笑。

一代代人都会老。不晓得大家看到没有：“七零后”“八零后”，这拨小人另有压力，白头发还出得特别早。

看到有些小人过去豪气万丈、出言不逊，现在却半头白发、雄心全无，又实在心痛他们。

说句老实话，“抗老”也是一种本事。我们的先人，“抗老”能力比我们强。那些老军人、老劳模、老教授，历经坎坷、备尝艰辛，不服老、不怕老，活到老、学到老，真是了不起。而我们的后人，对不起，真的要差一点，他们有的忧老，有的怕老，有的未老先衰，有的还躲在家里“啃老”……这样的小人，骨头忒软了。

人终归要老的，就像太阳终归要落山一样。一个“老”字，其实有两点对付就够了：一是年轻时要敬老，二是年老时不怕老。

闲话闲画

上海人个“左转弯”“右转弯”

文图 / 阿仁



环城个马路。11 路无轨电车就是沿牢甯条线路个。现在个 11 路公交车上还增添了用上海闲话来报站名。当然，伊所讲个上海闲话是无线电里讲个埃种字正腔圆个官方上海闲话。与阿拉平常上海人讲个闲话相比，更加糯一点，更加嗲一点。

上海滩是由晚清辰光个老城厢慢慢变成后来个十里洋场个。今朝开出一条小马路，明晨辟出一条大马路，旡没长远个规划。于是旧上海城区就甯能弄成了一个迷魂阵。前面有三叉路口、四叉路口，后面要碰鼻头转弯。左面直过来，右面弯过

去。到了改革开放以后，上海人对老城区个改造是努力拉直道路。对新城区个建设是采取棋盘式个开发马路与住宅小区。旧貌变新颜。

到上海来白相个外地朋友要熟悉与习惯老上海人为依指路个方式。“左转弯、右转弯”，“朝前走”、“朝后转”，上海人就是迭能样讲个。多问几趟也就寻对路了。上海人对人家问路还是老老热心个：“阿拉来讲拨依听……”

文、沈寂 图、范生福 范思田

茶叶蛋和原子弹

鸡是鸡蛋孵出来的，鸡蛋是最补的食品。上海人聪明，拿来烧荷包蛋、炒鸡蛋，当菜吃；烧水潜蛋、白煮蛋当点心；还将鸭蛋做成皮蛋、咸蛋作为粥菜。而最受人们欢迎的是茶叶蛋。

不论天寒热日，下午，傍晚，常常有小孩站在弄堂口马路旁，身边有一竹篮，用毛巾遮盖的热茶叶蛋。路人出少量钱就能买两只蛋，边走边吃。或买几只回家，全家享受。

“文革”后，副食品供应不足，茶叶蛋生意特别兴隆，一箩筐蛋可赚不少钱。怪不得有人说怪话：“研究原子弹勿及卖茶叶蛋”。

沪语童谣

造房子

创作 / 王云海

阿拉外婆六岁辰光白相造房子，弄堂里向水门汀浪粉笔划格子，挨好次序统统写好阿拉伯数字，攢块石头跳来跳去就算造房子。

阿拉姆妈六岁辰光白相造房子，幼儿园里拿仔积木搭间新房子，拆拆搭搭搭搭拆拆交关用心思，伊讲将来长大要当建筑工程师。

勿到六岁我就会得白相造房子，电脑一开屏幕高头马上画图纸，鼠标点点键盘敲敲再加动脑子，3 D 打印马上出来一幢高房子。

上期沪语谜底

1、桌子
3、窗

2、衣帽架
4、揩布